

Tschappergnar en ina chombra da durmir estra?

■ (anr/vi) «**Respecta ils cunfins**», sa cloma la campagna che l'uffizi federal lantschescha ensemen cun il Club alpin svizzer e cun il turissem. Ils gianelladers ed auters sportists d'enviern duain laschar en paus las selvaschinas. Proxima fin d'emna prendan ils emprims sportists las gianellas or da stgafà e sa legran dad ir siadora en la naiv nova ed en l'aria fina. Per las selvaschinas n'è la visita dals gianelladers nagin plaschair. Cuntzunt sch'els van en crusch e travers tras ils guauds u perlung l'ur

da guauds, explitgescha *Reinhard Schnidrig*, schef da la secziun chatscha e selvaschinas tar la confederaziun. «Sch'ins ha visitas a chasa, dastgan quellas forsa vegnir en cuschina, ma ins na lascha er betg ir ellas en la chombra da durmir», ha Schnidrig explitgà. Il guaud saja la chombra da durmir da las selvaschinas. Ils sportists d'enviern duain perquai traversar ils guauds mo sin las rutas inditgadas. Ils urs dals guauds sajan ils lieus, nua che las selvaschinas mangian e perquai duajan ils gianelladers u skiuns betg suan-

dar l'ur dal guaud. I saja cler ch'ina selvaschina na moria betg sin il fletg, sch'ella fruntia in giada sin in sportist d'enviern. Ma la primavaira chattian ils guardiaselvaschinas bleras selvaschinas che sajan crappadas da la flaiveltezza.

Perquai duain gianelladers, snowboardists, skiunzs e possesurs da chauns sa tegnair vi da quatter reglas: resguardar las zonas da protecziun da selvaschinas, restar sin las rutas inditgadas, guntgir ils urs da guauds e tegnair il chaun vi da la tschinta.



Ils gianelladers ed auters sportists d'enviern duain laschar en paus las selvaschinas.